

**АРАБШОҲИЙЛАР ДАВРИ ХОНИ АБУЛҒОЗИЙ БАҲОДИРХОННИНГ ҲАЁТИ,
ХОНЛИҚДАГИ БОШҚАРУВ ИСЛОҲОТЛАРИ, ТАРИХИЙ АСАРЛАРИ ВА ХОНЛИК
ҲУНАРМАНДЧИЛИГИ**

Матякубов Холбек Шоназарович
Хива Ичон қалъа музей- қўриқхонаси
ҳунармандчилик бўлими мудири

Аннотация: Ушбу мақолада муаллиф XVII-асрнинг ўрталаридағи Арабшоҳийлар даврида Хива хонлигидаги ижтимоий-сиёсий аҳвол, шунингдек Хива хони Абулғозий Баҳодирхоннинг ҳаёти, хонликдаги бошқарув ислоҳоти, илмий ижоди ва ўша даврдаги ҳалқ ҳунармандчилигининг ҳолати ҳақида маълумотлар беради.

Калит сўзлар: Хива хонлиги, Исфандиёрхон, Абулғозий Баҳодирхон, Янги Урганч, Орол, Иноқлар, Шажараи тарокама, Шажараи турк, бошқарув тизими, туркманлар, ислоҳотлар, Амударё, қурилиш, ҳунармандчилик, меъморчилик, ёғочсозлик, кошинпазлик, сополчилик.

Буюк ипак йўли чорраҳасида жойлашган Кўҳна Хоразм ҳудудида қадим ўтган даврларда ўзига ҳос турли цивилизациялар вужудга келган. Ушбу қадимий ўлка фан ва маданият маркази сифатида бутун дунёга донг таратган бўлиб, бу ерда ҳайратомуз гўзалликка эга шаҳарлар барпо этилган, бу заминда буюк математиклар, астрономлар, табиблар, тарихчилар, қомусий олимлар, шоирлар ва етук алломалар яшаб ижод қилган. XVI-асрнинг охири XVII-аср бошларига келиб Хоразмда ўзбек хонларининг ҳукмронлиги мустаҳкамланиб, мамлакатнинг иктисадий-ижтимоий ва сиёсий ҳаёти Амударё ўзанининг Каспийдан Орол денгизи томон ўзгариши натижасида жанубга силжиши, Хонлик маркази ҳисобланган Хива шаҳрининг сезиларли равишда ривожланишига олиб келди. Араб Муҳаммадхон отаси Хожи Муҳаммадхон (Хожимхон)дан сўнг 1602 йилда Хива дорулсалтанатига (дорус-пойтахт, подшоҳ яшайдиган шаҳар) хон бўлди. Академик Я.Ғуломов- “Араб Муҳаммадхон даврида марказни Хива шаҳрига кўчиргандар, шу даврдан бошлаб хонлик Хива хонлиги номини олди”[1],-деб ёzáди. Араб Муҳаммадхоннинг етти ўғли бор эди: булар Исфандиёрхон, Хабаш султон, Элбарс султон, Абулғозихон, Шариф Муҳаммад султон, Хоразмшоҳ султон, Афғон султон. Булардан Исфандиёрхон ва Абулғозихон Чингизий онадан туғилган эдилар. Араб Муҳаммадхондан кейин 1623-йилда катта ўғли Исфандиёрхон хонлик тахтини эгаллаб 1643-йилгача ҳукмронлик қилди. Абулғозий Баҳодирхон акаси Исфандиёрхондан кейин аста секинлик билан хонлик ҳудудларинини қўлга кирита бошлайди. Даставвал 1643-йилда Орол хонлигини эгаллагач, Орол ўзбекларига таяниб, Хива хонлиги устига юриш қиласи, катта жанглар ва курашлар эвазига 1645 йилда Хива тахтини эгаллаб, ҳукмронликни үзил кесил

қўлга киритиб, хонликни 1663-йилга қадар қарийб йигирма йилга яқин вақт мобайнида одилона бошқариб, хонлик худудида қатъий ва мустаҳкам тартиб ўрнатишга эришади. Олий насаб ва тожу-тахт соҳиби бўлган Абулғозий ибн Арабмуҳаммад ҳижрий сана 1022 йил асад буржи 15-раббиъ-ул- аввал ойида, милодий сана 1603-йилнинг 23-августида Хоразм хонлиги пойтахти Урганчда дунёга келган бўлиб, ўзбек элининг қўнғирот уруғидандир. У ёшлигида ўз отасининг номи билан аталувчи Арабмуҳаммадхон мадрасасида таҳсил олади. Ёш Абулғози ўз ака-укалари ўртасида ўткир зеҳни, қобилияти ва зукколиги билан ажralиб турарди. Абулғозий болалик ва ўсмирлик йилларидан узоқ ва яқин қариндошлар айниқса ота-фарзанд, оға-инилари ўртасидаги тожу-тахт учун бошланган ўзаро курашлар гирдобига тушиб қолган бўлишига қарамай, замонасининг энг билимдон кишиларидан таълим олиб тарих, адабиет ва табобатни қунт билан ўрганди. Абулғозий ибн Арабмуҳаммад 1644-1664-йилларда Хоразм тахтини эгаллаб, бутун умрини тахт учун кураш ва жанг- жадалларга бағишилаган ҳукмдор бўлган. Давлат арбоби сифатида ўта қобилиятли шахс саналган. Унинг ҳукмдорлик даврида давлат марказлашди. Мактаб ва мадрасалар қурилди, бир қанча каналлар янгидан ва қайта қурилди. Абулғозий тахтга ўтиргандан бир йил ўтгач 1646-йилда Хонақоҳнинг ғарб томонида бир қалъа қуриб, бу шаҳарга Янги Урганч номини берди ва унга Кўхна Урганч аҳолисини кўчириб келтирди. Бугунги кундаги Хоразмнинг маркази ҳисобланган Урганч шаҳрининг барпо этилиши Абулғозий номи билан боғлиқ. Абулғозий ҳукмронликни қўлга киритганидан сўнг, хонлиқда янги бошқарув ислоҳотлари ўтказди, биринчи навбатда хонликнинг барча лавозимларини туркман йулбошчилари кўлидан олиб, ўзбек уруғларидан бўлган бошлиқларга берди. Хивалик тарихчи Шермуҳаммад Муниснинг маълумот беришича Абулғозий маъмурӣ ислоҳотлар ўтказиб, хонлик бошқарув тизимини батамом янгитдан ташкил этди, унинг таъбири билан айтганда: “андоқким икки шайх ул-ислом, икки қози, бир раис Саид ота авлодидан, бир мутавалли, бир нақиб, тўрт оталиқ, тўрт иноқ, тўрт мироб, тўрт парвоначи, икки ока, икки арбоб, тўрт чиғатои иноқи ва бир вазирким, холо меҳтар дерлар ва бир қушбеги, бу иккови ўринсиз хон ҳузурида оёқ устида турадилар”[2]. “Абулғозихон ўзбекларнинг уруғларини бирлаштириб тўпа деб атади ва бу тўпаларнинг бошлиғи қилиб иноқлар белгиланди. Бундай тўпалар Хивада тўрттинани ташкил этган, энди аввалги шажара бошлиқлари (бийлар), уруғ оқсақлари (оталиқлар) устидан янги бошлиқ-иноқ ҳукмрон бўлиб қолди. Уруғлар бирлаштирилгандан кейин ўйғур-найман, қўнғирот-қиёт, нукус-манғит, қанғли-қипчоқ тўпалари пайдо бўлди. Бу тўрт тўпанинг ичидаги кучлиси қўнғирот уруғи бўлиб унинг бошлиғи бўлган иноқнинг хонга ва мамлакат сиёсатига таъсири бирмунча кучли эди”[3]. Абулғозий ҳукмдор бўлиши билан бирга тарихчи, шоир ва табиб ҳамдир. Абулғозий Баходирхон тарихда ҳукмдор эмас балки йирик олим сифатида из қолдирди. “Бу факирга, -деб ёзган эди Абулғозий Баходирхон ўзининг Шажараи-турк асарида –“Худои таоло иноят қилиб кўб нимарса берган турур. Ҳусусан

уч ҳунар берган турур. Аввал, сипохигарликнинг қонун ва йусини ким, нечук отланмоқ ва юримак ва ёвга ясоқ ясамок, кўп бирлан юруганда нечук қилмок, оз бирлан юруганда нечук қилмок, дўстга, душманга нечук сўзлашмак. Иккинчи, маснавият ва қасойид ва ғазалиёт ва мукаттаот ва рубоиёт ва барча ашъорни фаҳмламаклик, арабий ва форсий ва туркий луғатларни маъносини билмаклик. Учинчи, Одам аҳдиндин то бу дамгача Арабистонда, Эрон ва Туронда ва Мўғалистонда ўтган подшоҳларнинг отлари ва умрларининг ва салтанатларининг кам ёки зиёдин билмаклик”[4]. Абулғозийхон икки йирик тарихий асар яратди, биттаси 1658-1661-йилларда ёзилган “Шажарайи тарокама” (Туркманлар шажараси) асари бўлиб, ўзи айтганидек туркманларнинг мулла, шайх, ва бекларининг илтимоси билан ёзилиб, бу асарида туркий қабилаларнинг ҳусусан туркман халқининг келиб чиқиши ҳақида қимматли маълумотлар берилади. Академик В.В.Бартольд “туркманлар ҳақида бундай маҳсус тарихий асар хеч бир бошка туркий халқларда йўқ”[5] деб асарнинг ноёблигини эътироф этиб ўтган. Иккинчи асари эса 1661-1663-йилларда ёзилган «Шажарайи турк» (Турклар шажараси) номи билан машҳур бўлиб, асарнинг ёзилиш сабаблари ҳақида муаллифнинг ўзи шундай деган: “Аммо... бизнинг жамоатимизнинг Абдуллоҳоннинг отлари бирлан бизнинг оталаримизнинг айрилган еридан то бизга келгунча тарихларини битмай эрдилар. Бу тарихни бир кишига таклиф қиласи деб фикр қилдук. Хеч муносиб киши топмадук. Зарур бўлди. Ул сабабдан ўзимиз айтдук”[6]. Абулғозий Баҳодирхоннинг ушбу асарида Хива хонлигидаги ижтимоий ҳаёт, халқнинг турмуш кечириши, хонликдаги солиқ тизими, хонлар фаолиятидаги ўзига хос ижобий томонлар ва баъзи хатолар, ўзаро ички ва ташқи келишмовчиликлар ва урушлар ҳақидаги маълумотлар батафсил ёритилган. Шунингдек унинг тиббиётга оид «Манофеъ ул-инсон» ("Инсон саломатлиги учун фойдали нарсалар") асари бўлиб, бу асар Абулғозий томонидан 1657 йилда ёзилган. Асар оддий халқ тушунадиган тилда ёзилган бўлиб, бу ҳақда Абулғозий ўзи шундай дейди: “Бу тарихни яхши ёмон барча билсин деб турк тили билан айтдум. Бир калима чигатой, форсий, арабийдан қўшмайман. Равshan бўлсин деб туркийни ҳам андоқ айтдимки беш яшар ўғлон ҳам тушунур”[7]. Бу асар иҳчам маълумотнома шаклидаги ёзилган бўлиб, муаллиф яна ўз асарида қўйидаги фикрларни баён қилган: “Китобларни назарга келтириб эрдик, мақсади гоҳо топилур эрди ва гоҳо топилмас эрди, улким топилур эрди, ҳозир мashaққат билан ўртага келур. Шул сабабдин, иллатга илож қилмоқ учун, мўътабар китоблардин тахлаб жам қилиб, ондин сўнг иллатларни баён қилдим”[8]. Абулғозий Баҳодирхон Хоразм хонлари ичida хонлик тахтини 1663-йилда ўз ихтиёри билан ўғли Анушахон ибн Абулғозийхонга тинч йўл билан топширган ягона ҳукмдор бўлиб, орадан кўп вақт ўтмай шу йилнинг апрель ойида 60 ёшида ҳақ раҳматига кетди. Абулғозийхон тарихда буюк ислохотчи ҳукмдор ва олим сифатида ном қолдирди. Ул муҳтарам зотнинг жасади Хива шахридаги Пахлавон Махмуд мақбараасига дафн этилди. Хонлик ҳунармандчилиги тарихига Хоразмшоҳлар давридан бошлаб назар ташлайдиган бўлсак, бу даврга келиб

Хоразмдаги шаҳарларда йирик ҳунармандчилик марказлари пайдо бўлди. Ип, мато, гилам, шойи, мис ва темирдан қурол-аслаҳа, пичоқ тайёрлаш, шиша маҳсулотлар тайёрлаш авж олди. Бу даврдан бошлаб Хоразмда меъморчилик ва ҳунармандчилик бирмунча рижонланиб борди, чунки бу даврларда Хоразм маданий хаётида туб ўзгаришлар содир бўла бошлайди. Шаҳарлар қиёфаси ўзгаради саройлар, масжидлар, мадрасалар, мақбаралар, карвонсаройлар қурилди. Айниқса бино ва иншоотлар қурилишида ўймакорли устунлардан кенг фойдаланилган. Хоразмшоҳ Маъмун томонидан Урганчда қурилган бир сарой дарвозаси гўзаллиги ҳақида ал-Мақдисий шундай ёзди: “Хажжож дарвозаси ёнида ал-Маъмун қурдирган сарой бор. Саройнинг дарвозаси шу даражада ҳашамдорки, бутун Хуросонда гўзаллик жиҳатидан унга тенг келадигани дарвоза йўқдир”[9]. Хива шаҳридаги Ичон-қалъада жойлашган Жума масжиднинг энг қадимги устунлари Х-асрда Амударё тошиб Киёт шаҳрини ювиб кетгандан сўнг мазкур шаҳар масжидидан олиб келиб ўрнатилган бўлиши мумкин деган тахминлар бор XI-XII-асрларда Хоразмда қурилиш ашёси сифатида меъморчилик безагида пишиқ ғишт, ўйма тоштарошлиқ, кошин, ганч ва ёғоч ўймакорлигидан фойдаланиш асосий ўрин эгаллади. Айнан бу даврга келиб Хоразмда халқ амалий санъати янада гуркираб ривожланди. Мураккаб нақш туридан бўлган геометрик нақш, яъни гирих нақши безакларда етакчи ўринни эгаллайди. Гирих нақши янада ривожланди. Ўрта асрларга оид ёғоч ўймакорлиги намуналари ўзининг бадиий нафис табиий ашёлардан ишланганлиги билан кишини лол қолдиради. “Бу вақтда ҳашамдор дунёвий ва диний-маросимиий иншоотлар қурилди, ганч ўймакорлиги безаклари, кошинлар, нақшу-нигорлар кенг қўлланилди, эшиклар ва устунларни ажойиб, бетакрор ўймакорлик саъати безаб турарди. Сирланмаган сопол буюмларнинг янги шакллари пайдо бўлиб, кошинпазлиқда эса сиркорлик технологияси такомиллашди, кошиндан шакллари хилма хил бўлган, сифати яхшиланган, аъло навли сопол идишлар тайёрланди”[10]. XIV-XV- асрларда эса Урганчда гўзал бозорлар, кенг кўчалар, кўплаб уйлар бўлган, масжид ва мадрасалар билан бир каторда саройлар, шифохоналар, бозорлар, турар жой бинолари ҳам бўлганлиги манбаларда тилга олинади. Шунингдек бу даврга келиб Хоразмда Хитой чиннисини эслатувчи ок сиртга нилий накш тушириш услубидаги буюмлар кенг урф бўлади. Меъморчилик иншоотлари безагида эса сиркорлик янада кенгрок қўлланила бошлайди, кўк-мовий, оқ кошинли қопламалар пайдо бўлиб, янги услугуга асос солинади. Археологик қазишмалар натижасида Хоразм ҳудудида Кўхна Урганчдан XV-XVII-асрларга оид сирланган кошин косалар, Жампик қалъадан XIII-XIV-асрларга оид сирланган кошин ликопчалар, шунингдек мармардан ясалган ҳунармандчилик маҳсулотлари ҳам топилган бўлиб, булар IX-асрга оид Бургут қалъадан топилган мармар чироғдон, XV -асрга оид ислимий нақш ва ҳайвонлар тасвири ўйилган мармар чойнак, ўша даврга оид қора тошдан ясалган қозонча топилган. Бундан ташқари бу даврда мармардан ўйма ёзувли қабртошлар, ўйма устун пойлари тайёрланган. Хива шаҳридаги “Ичан-қалъа” музей-қўрикхонаси бўлимида

сақланаётган Исфандиёрхоннинг XVI-аср ёдгорлигига ҳос бўлган сандиқ услубидаги мармар қабр тоши нафис ўсимликсимон ўйма нақшлар билан безатилган.XVII- асрга келиб эса хонликда шаҳарсозлик фаолияти тўхтаб, суғориладиган ерлар қисқариши натижасида, хўжалик хаёти издан чиқиб, минтақада савдо фаоллиги сусайди. Сирланган сопол буюмлар тайёрлаш маҳорати ва нақшлаш сифатлари пасайиб кетди. Ёзма манбаларнинг маълумот беришича, бу даврда заргарлар, ёғоч ўймакорлари, тоштарошлар, кандалорлар ишлаганлар, шиша ишлаб чиқариш сақланиб қолган, кўнчилик, ип-газлама ва шойи тўқимачилиги ривожланган аммо улар гулсиз, сидирға бўлган, айримларигина бир хил ранг ёки турли рангдаги йўл-йўл безак берилган. Хивада айниқса, Абулғозийнинг хонлик даврига келиб Хивада мис буюмлар ишлаб чиқариш ва унга нақш ўйиш санъати шунингдек майший кулолчилик тез ривожланиб унинг мактаблари вужудга келган. Қурилиш ашёси сифатида меъморчилик безагида пишиқ ғишт, ўйма тоштарошлиқ, кошинпазлик, ёғоч ўймакорлигидан фойдаланиш анча ривожланди. Бу даврда қурилиб ҳунармандчиликнинг бир неча турлари асосида барпо этилган ва тилга олса арзугилик иншоотларга Хивадаги Араб Мұхаммадхон томонидан қуриб битказилган Араб Мұхаммад мадрасаси (1616 й) ва Абулғозий томонидан мураккаб тарх асосида қурилган Анушаҳон масжиди ва ҳамоми (1657 й) яққол мисол бўла олади. Бу иншоотлар қурилишида ҳунармандчиликнинг юқорида айтилган пишиқ ғишткорлик, кошинпазлик, ёғоч ўймакорлик, нақшинкорлик, ганчкорлик, тоштарошлиқ турларидан кенг фойдаланилган. Булардан ташқари бу даврга келиб Хива хонлигига ҳунармандлар томонидан мисдан ишланган ҳар хил турдаги буюмлар тунча, катта-кичик қозонлар, лаган, жом, идиш-тавоқ, қошиқ, чойнак, қумғон, сулопча, патнис ва бошқа ҳалқ қундалиқ турмуш шароитида бирламчи зарур ашёлар аввало бозорларда савдо-сотиқни ривожлантирган, ҳунарманд ва савдогарлар орқали ҳалқ қундалиқ турмушкига кириб келди. Демак, Абулғозий Баҳодирхон даврига келиб ҳунармандчиликнинг кўпгина тармоқлари ривожланган бўлиб, бу тармоқлар хонликнинг иқтисодий ривожига ҳам ўз таъсирини кўрсата олган. Шаҳарлар ривожи буюртма билан ҳунармандчилик маҳсулотлари тайёрлаш ва бозорларда сотилишини, ҳунармандчилик маҳсулотлари ишлаб чиқаришнинг жадал ўсишини, ҳунармандчилик маҳсулотлари товарга айланишини, товар айирбошлаш ва сотиш учун маҳсулот ишлаб чиқаришни жадал ривожлантириди. Абулғозий Баҳодирхоннинг Хива хонлигидаги давлат бошқаруви ва бебаҳо тарихий мероси, шунингдек ҳалқимиз томонидан санъат асари даражасидаги яратилган ҳунармандчилик ва амалий санъат асарларининг бебаҳо дурдоналари биз юртдошларимизга қадимда ўтган буюк аждодларимиз, ижодкор ва уста-ҳунарманд ота-боболаримизга нисбатан чексиз фахр-ифтихор ва ғурур баҳш этади.

ФОЙДАЛАНИЛГАН АДАБИЁТЛАР РЎЙҲАТИ:

1. Гуламов. Я. Хоразмнинг сугорилиш тарихи. Тошкент. 1959 й. 2076
2. Огахий ва Мунис. Фирдавс-ул-икбол. Тошкент. 2010 й.
3. Худайберганов. К. Хоразм хонлари. Тошкент Академнашр 2019. 956.
4. Абулғозий Баҳодирхон. “Шажарайи турк”. Т.: “Чўлпон”. 1992.-Б.12.
5. Бартольд. В.В. Хорезмшахы Соч. Т. 2. Ч. 2. М. 1964. с-547.
6. Абулғозий Баҳодирхон. “Шажарайи Тарокима”. Т.: 1995.-Б.20.
7. Собиров. Р. Абулғозий Баҳодирхоннинг Манафөъ ул-инсон асари. Урганч. 1994 й.
8. История Хорезма с древнейших времен до наших дней. Тошкент. 1976. 102.6.
9. Вактурская. Н.Н. Классификация средновековой керамики Хорезма 9-12в.в.
10. Керамика Хорезма. Под редакцией С.П. Толстова и М.Г. Воробьевой. Труды Хорезмской экспедиции. Том 4. М. 1959. 300.6